

Tubuh Persatuan Silat Eropah

B. Minggu (M)

Oleh **MOHD RAHIME YUSOFF**

MALAYSIA akan diwakili oleh Setiausaha Bahagian Kebudayaan di Kementerian Kebudayaan dan Pelancongan, Haji Abdul Aziz Deraman, ke persidangan silat antarabangsa di Bonn, Jerman Barat pada Februari ini.

Persidangan itu antara lain akan membincangkan mengenai penubuhan Persatuan Silat Eropah bagi tujuan memperluaskan lagi perkembangan silat di rantau itu.

Jika Persekutuan Silat Antarabangsa (Persilat) meluluskan penubuhan itu, ia mungkin membantu mempercepatkan perkembangan sukan itu dan membolehkannya dipertandingkan di Sukan Olimpik 1992.

Haji Abdul Aziz, yang juga Naib Presiden Persilat dijangka akan membentangkan kertas kerja mengenai usaha Malaysia ke arah mengembangkan silat Melayu di Eropah.

Penolong Setiausaha Persekutuan Silat Kebangsaan Malaysia (Pesaka), Sulaiman Sari-



■ **HAJI AZIZ DERAMAN**

jan, berkata selain menyertai persidangan berkenaan, Persatuan Silat Jerman Barat juga akan menganjurkan pertunjukan di ibu kota negara itu.

Katanya, jika Malaysia diundang bagi mengadakan persembahan, kemungkinan satu rombongan silat negara akan turut ke sana nanti.

- 8 JAN 1989

"Kami akan bincangkan perkara ini jika diundang. Inilah kesempatan terbaik kepada negara bagi memperkenalkan silat Melayu di Jerman Barat," katanya.

Sulaiman berkata, sebenarnya undangan tidak rasmi sudah dibuat oleh pertubuhan silat Jerman ketika rombongan negara berada di sana bulan lalu, tetapi Pesaka masih menunggu undangan rasmi.

Bulan lalu, Pesaka dengan kerjasama Kementerian Kebudayaan dan Pelancongan mengadakan lawatan dan pertunjukan di Perancis, Jerman Barat dan Belanda.

Ketika di Perancis, badan silat negara itu sedia bekerjasama dengan Pesaka bagi menjadi 'pusat' mengembangkan silat Melayu di rantau Eropah.

"Saya percaya sokongan Perancis akan mempercepatkan perkembangan silat Melayu di Eropah. Dan kesempatan di Jerman Barat masih dinantikan," kata Sulaiman.

Sulaiman berkata, jika Persilat merestui penubuhan Persatuan Silat Eropah, ia mungkin mempercepatkan hasrat Persilat bagi membolehkan sukan itu diterima sebagai salah satu acara di Sukan Olimpik.

Katanya, perkembangan silat di Eropah begitu menggalakan. Ini menunjukkan peluang silat bertanding di Sukan Olimpik semakin cerah.

Mengikut perlembagaan Majlis Olimpik Antarabangsa (IOC), satu-satu acara sukan yang dipertandingkan di temasya itu mesti menjadi sukan penting kepada 50 negara.

"Selain di Eropah, kami juga bercadang memperluaskan seni silat di rantau Asia terutama di Asia Barat. Inipun bergantung kepada keupayaan Pesaka melahirkan jurulatih berwibawa bagi tujuan itu," katanya.